

Sa Mundo ng mga Kulisap

Mga Tula para sa Dalawang Boses

Tulang Pambata

Filipino

Lahok sa Gawad Palanca 2012

Sa Mundo ng mga Kulisap

*Mga Tula para sa Dalawang Boses**

Mga Tula sa Koleksyon:

Mga Kuliglig

Mandarangkal

Bayaning Langgam

Inhinyerong Gagamba

Mga Sutil na Lamok

Butiki

Mga Bubuyog

Mga Bandilang Paru-paro

Putakti

Tutubi

Awit ng Gamu-gamo

Mga Alitaptap

Sirkerong Tipaklong

* Bagama't isinulat ang mga tula para sa dalawang nagsasagutang mga boses, maaari ring basahin na parang pares-pares na mga tula ang bawat tula. Maituturing buong tula ang kada isa sa dalawang hanay ng bawat tula.

Mga Kuliglig

Sa mga gabi ng tag-init

Sa mga hapon mula Marso

Abril hanggang Mayo

Sa matatangkad na damo

Sa matatangkad na damo

Matataas na kogon

Pati sa mga amoreseko

Tumatalak

Tumatalak-talak

Talak lang nang talak

Dada nang dada

Pumuputak-putak

Parang mga inahing

Nangingitlog

Parang mga palaka sa tag-ulan

Ang mga kuliglig.

Ang mga kuliglig.

Ewan, kung ano

Ewan kung sino

Ang pinag-uusapan

Ang pinag-uusapan

Pinagtsitsismisan.

Pinagsasabihan.

Subalit sa katapusan ng Mayo

Sa katapusan ng tag-init

Matamlay na bumubulong

Nananaghoy

Parang inulila

Ang matatangkad na damo

Pati mga amoreseko.

Mandarangkal

Tinatawag siyang

Samba-samba

Samba-samba

Ang isa pang pangalan n'ya

Dahil sa anyo

Dahil sa porma

Mukha nga namang

Nagdadasal

Mukhang relihiyoso

Pero

Pero

'Wag ka!

Kuwidaw, kaibigan!

Ingat, pare!

Malupit itong

Mandarangkal

Walang patawad

Ang samba-samba

Sa isang iglap

Sa isang dangkal

Maari kang silain

Bibiktimahin

Wala itong patawad

Mapa-langaw

Pati butiki

Alupihan

Maging alakdan!

E, kung kauri nga

Kinakanibal

Ibang kulisap pa kaya?

Dadagitin ka

Gagawing hapunan

Walang sinasanto

Mapa-lamok

Palaka

Maging alakdan!

Kung mismong kasintahan n'ya

Pinapapak ang ulo

Ibang kulisap pa kaya?

Bayaning Langgam

Walang kaduda-duda

Walang alinlangan

Masipag

Matiyaga

Pursigido

Hiyang sa trabaho

Ang langgam

Ang bidang langgam

Palaging abala

Palaging nag-iimbak

Nagtitipon

Ng pagkain.

Ng pagkain.

Umaga pa lang

Pagsikat ng araw

Pasan-pasan na

Karga-karga

Mga butil

Mga mumo

Mabigat pa

Kaysa sa kanya.

Sa tanghali

Tipon nang tipon

Mga pira-piraso

Ng pagkain.

Bida ang langgam

Matiyaga

Ngunit gaano man

Kahuwaran

Ayoko pa rin

Sa nangangagat

Na langgam.

Higit na mabigat

Kaysa sa kanya.

Hanggang sa dapit-hapon

Imbak pa rin nang imbak

Buhat nang buhat

Mumunting mumo

Masipag ang langgam

Bayani!

Inhinyerong Gagamba

	Inhinyerong gagamba
Henyong arkitekto	
	Gumagawa ng bahay
Naghahabi ng tirahan	
	Mula sa mga hibla
Mula sa mga sinulid	
Na sutla.	Na sutla.
Oktupos sa lupa	
	Walo ang paa
Hintay!	
Apat na pares ang mata	
	Walo rin ang mata!
Mula sa malaking tiyan	
	Parang ulo ng oktupos
Mukhang bumubuga	
	Naghahasik
Namamana	
	Ngunit imbis na tinta
Ng mga sinulid	

Na sutla.

Mga hibla

Na sutla.

Mga Sutil na Lamok

Pak!

Pak! Pak!

Parang palakpak

Tunog ng pagsapak

Tunog ng pagsapok

Sa pesting lamok

Sa sutil na lamok

Pak!

Pak! Swak!

Um!

Sapol

Tinamaan

Tinamaan din

Ang pesting

Lamok.

Ang sutil

Na lamok.

Mahilig sa binti

Mahilig sa braso

Mahilig mangagat

Aali-aligid

Tapos, mangangagat.

Kaya ayon

Pak. Swak!

Tinamaan ka rin!

Todas!

Mahilig mamerwisyo

Bubulung-bulong

Tapos mangangagat.

Pak! Pak!

Um! Sapul din.

Todas!

Butiki

Mula sa kisame

Parang ritwal

Pagsapit ng orasyon

Gagapang

Bababa

Gagapang

Hahalik sa lupa

Hahalik sa lupa

Waring nagmamano.

Tapos

Babalik

Aakyat at babalik

Kakapit sa dingding

Sa dingding

Magmamatyag

Magbabantay

Ng dumaraang lamok

Ng naliligaw na langaw

Ibubuga ang dila

Ibubuga ang dila

Animo'y apoy

O palasong pana

Sisiluin ang langaw

Hapunan!

At sisinok,

Tiki!

Bu-tiki!

Buong gabing sisinok.

Bu-tiki!

Parang singha ng dragon

O bitag

Sisiluin ang lamok

Hapunan!

Tiki!

Bu-tiki!

Buong gabing sisinok.

Tiki!

Mga Bubuyog

Hukbong manggagawa

Lupon ng mga bubuyog

Lumalabas

Pumapasok

Dumidiretso

Tuluy-tuloy lang

Labas-masok

Sa pula

Dilaw

Sa malambot

Lila

Malasutla

Kulay-rosas

Babasagin

Na sinapupunan

Na sinapupunan

Ng mga bulaklak

Ng mga rosas

Gumamela

Sampagita

Humihigop

Sumisipsip

Ng pulot

Tumpak

Ang baywang

Ng bubuyog

Ang guhit sa tiyan

Mga linyang balat.

Ang ulo

Palaging abala

Humahagong

Bz-z-z-z-z

Kampupot

Sumisimsim

Ginintuang pulot.

Seksi, makitid

Ang baywang

Matitingkad na mga linya

Sa tiyan

Maliit ang ulo

Abalang-abala

Bz-z-z-z-z

Bz-z-z-z-z

Ang mga pakpak

Parang hamog

Nagdadala

Sa bintana

Ng mga bulaklak

Para kunin

Ariin

Hakutin

Ang malalapot

Na katas

Ng tubig at araw

Na ginawa

Ang mga pakpak

Parang yari sa tubig

Naghahatid

Nagbubukas

Ng malasutlang mga pinto

Para anihin

Angkinin

Ang matatamis

Na katas

Na niluto

Sa sinapupunan

Ng mga bulaklak.

Ng mga bulaklak.

Mga Bandilang Paru-paro

Iwinawagayway

Iwinawasiwas

Sa hangin

Sa parang, sa bukid

Ng mga paru-paro

Ng makukulay

Na mga paru-paro

Sari-sari

Iba't ibang

Watawat

Makukulay na bandila

Sa pakpak

Sa pakpak ng

Alibangbang

Mariposa

Pakpak ng diwata

Maningning na lona

Ng matitingkad na pinta

Anong kawiliwiling bayan

Anong bansang masaya

Ang sinasagisag ninyo?

Sa parang

Maging sa dalampasigan

Mukhang masaya

Ang makulay na bayan

Ng iwinawagayway

Ninyong bandila.

Ang sinasagisag ninyo?

Sa bukid

At sa mga panaginip

Wari'y tahimik at maganda

Ang masayahing bayan

Ng iwinawasiwas

Ninyong bandila.

Putakti

	Ang putakti
Mahilig sa kape	Mahilig
	Sa kutsinta
Sa tsokolate	
	Sa ubeng-halaya
Malihig sumawsaw	
Sa sabaw	
	Sa lugaw
Sa baso ng samalamig	
Sago at gulaman	
	Sa puto't bibingka
	Maging sa suman.
Ang putakti.	Ang putakti
Mapilit	
	Matiyaga
May-kusa	
	Pinupursigi ang gusto
Sinusundan	
Ang kinahihiligan.	
	Hindi tinatantanan

Hinahabol

Ako!

Hinahabol.

Hinahabul-habol

Ako!

Tutubi

Higanteng mga mata

Libu-libong lente.

Dadawalang mata

Dadalawang mata

Ngunit hindi payak

Libu-libong lente.

Libu-libong lente.

Tutubi!

Tutubi!

Ilang imahen ko

Ang nakikita mo?

Sa paningin mo,

Libu-libo rin ba ako?

Dalawang pares ng pakpak

Dalawang pares

Mala-kristal

Maninipis na mga pakpak

Mala-salamin

Maninipis, mukhang babasagin

Subalit matibay

Parang sahig ng bulwagan

Sinasayawan ng araw

Palaruan ng liwanag

Dinadaan-daanan

Pinagtatakbuhan

Pinaglulundagan

Parang swimming pool

Pinaglalanguyan

Ng mga kulay:

Ng mga kulay:

Pula

Dilaw

Berde

Bughaw

Asul

Lila

Dalandan

Indigo

Dilaw

Indigo

Tutubi, tutubi

Kaibingang tutubi!

Mga pakpak mo'y

Nag-aanino ng araw

Mga pakpak mo'y

Nagsasalamin ng liwanag

Mga kulay sa pakpak mo'y

Kawangis

Kakambal

Ng bahaghari.

Ng bahaghari.

Awit ng Gamu-gamo

O, ilaw!

O, giliw!

Sa gabi ng brown-out

Sa mapanglaw na brown-out

Ikaw ang dalangin.

O, ilaw!

Pulot

Paraiso

Tamis

Hinangad

Pinangarap

O, giliw!

Sa gabing mapanglaw

Ikaw ang dalangin.

O, ilaw!

Pulot-pukyutan

Ng gamu-gamong puso

Paraisong

Puno ng tamis

Tamis na ninais

Inasam

Pinanagimpan

Sa buong maghapon

Sa buong maghapon.

O, ilaw!

O, giliw!

O, giliw!

O, ilaw!

Bituin sa langit

Buwan sa karimlan

O, giliw!

Nag-aapoy kong sinta

Liwanag ng kandila

Lumiliyab sa tuwa

Maari ka bang hagkan

Yakapin

Yakapin at hagkan

At hagkan

Hanggang ako'y

At nang ako'y

Maging liwanag

Maging liwanag

Na rin.

Na rin.

Mga Alitaptap

Kumukutikutitap!

Ang mga alitaptap

Kumukutikutitap

Sa gabing madilim

Sa papel na itim

Sumusulat sila

Liwanag ang tinta nila

Ang mga alitaptap

Sa itim na langit

Sa papel ng gabi

Kumukutikutitap!

Kumukutikutitap

Sa gabing kay itim!

Sa pisngi ng langit

Sa pisngi ng gabi

Kumukutikutitap

At pumipirma

Kumikislap na tinta!

Ang mga alitaptap

Sa pisngi ng gabi

Kumukutikutitap

Pumipirma

Kumukutikutitap

Na pirma

Sa langit.

Sa gabing kay itim

Sumusulat,

Pumipirma

Sa papel na pisngi

Ng langit.

Sirkerong Tipaklong

Tipaklong

Tipaklong, tipaklong

Talon

Talon ka nang talon

Lukso

Lukso ka nang lukso

Lundag dito

Lundag doon

Lundag doon

At dito naman

Sirkero kang tipaklong

Sirkero

Mataas ang talon

Talon ka nang talon

Malayo

Doon pa sa dako

Ang abot ng lundag.

Ang abot ng lundag.

Lukso

Luksong-tinik

Dahon sa dahon

Sanga sa sanga

Damo sa damo

Lundag-kabayo

Sirkerong tipaklong

Talon ng tipaklong.

Sa dahon

Dahon sa dahon

Halaman sa halaman

Luksong-palaka

Talon ng sirkerong

Sirkerong tipaklong.

Wala nang kasunod.